

Nameya Pawlos a pêşî ji Selanîkiyan re

Pêşgotin

Selanîk paytextê Makedonyayê bû. Pawlos di gera xwe ya diduyan de çû wir. Gava ku peyva Xwedê belav dikir ew rastî êrîşên giran hat û mecbûr bû ku ji bajêr derkeve (Karên Şandiyên 17:1-10). Beriya ku Pawlos derkeve, civîneke bawermendan hatibû avakirin. Lê belê ev bawermendên ha, hê ji serî ve bê rêber bûn. Pawlos gelek xema vê yekê dixwar, loma hê gava ku li Atînayê bû, Tîmotêyos şand ba wan (1 Selanîkî 3:1-2) û demekê bi serê xwe ma (Karên Şandiyên 17:15-16). Tîmotêyos, piştî ku rêwîtiya xwe qedand û vegeriya Korîntê, ji civîna Selanîkê xeberên şahiyê anîn (1 Selanîkî 3:6; Karên Şandiyên 18:5).

Bawermendên Selanîkê, li hember hemû zordarî û êrîşan ji baweriya xwe gav bi şûn de navêtin. Çiqas dihat ew di yekîtiya Mesîh de xurt dibûn û Mizgînê belav dikirin. Lê belê dixwestin ku hin tiştan ji Pawlos hîn bibin, bi taybetî jî li ser hatina diduyan a Îsa Mesîh. Pawlos nameya xwe ya pêşî ji Korîntê ji Selanîkiyan re nivîst (Karên Şandiyên 18:11).

Ev name dikare bi vî awayî bê beşkirin:

I. Silav 1:1

II. Razîbûn û spasî 1:2-3:13

III. Jiyana ku bi dilê Xwedê ye 4:1-12

IV. Hîndariya li ser hatina Îsa 4:13-5:11

V. Şîret û gotinên dawî 5:12-28

Silavkirin

1 Ji Pawlos*, Sîlas* û Tîmotêyos*,
ji civîna* bawermendan a Selanîkiyan re, ya ku bi Bav Xwedê
û bi Xudan Îsa Mesîh e:

Kerem û aşî li ser we be.

Baweriya Qenc a Selanîkiyan

² Em her gav ji bo we hemûyan ji Xwedê re şikir dikin û di nav dayên xwe de bê rawestî we tînin bîra xwe. ³ Em li ber Bavê

xwe Xwedê kirinên we yên ji baweriya* we, keda we ya ji hezkirinê û semaxa* we ya ji hêviya ku bi Xudanê me Îsa Mesîh e, tûnin bîra xwe. ⁴ Ya birayên ku hezkiriyên Xwedê ne, em dizanin ku wî hûn bijartin, ⁵ çimkî Mizgîniya me ne tenê bi peyvê*, lê belê bi hêzê, bi Ruhê* Pîroz û bi piştrastiyeke mezin gihîşt we. Hûn dizanin ku em ji bo we, di nav we de mirovên çawa bûn. ⁶ Û hûn bûn mirovên ku mîna me û mîna Xudan dikin; we di nav gelek tengahiyan de bi şahiya Ruhê Pîroz peyv qebûl kir. ⁷ Bi vî awayî hûn ji bo hemû bawermendên Makedonya û Axayayê* bûn mînak. ⁸ Çimkî peyva Xudan ji nav we derket û ne bi tenê di nav Makedonya û Axayayê de belav bû, lê belê baweriya we ya bi Xwedê gihîşt her cihî, wusa ku êdî ne hewce ye ku em tiştekî ser ve zêde bikin. ⁹ Çimkî ew li ser me dibêjin, ka we çawa em qebûl kirine û çawa hûn ji pûtan li Xwedê vegehiyan, ku hûn xulamtiyê ji Xwedayê jîndar û rast re bikin ¹⁰ û li hêviya hatina Kurê wî ya ji ezmanan bin. Ev, ew Îsa ye, yê ku Xwedê ew ji nav miriyan rakiriyê û ew e yê ku me ji xezeba ku tê xilas dike.

Karê Pawlos li Selanîkê

2 Birano, hûn bi xwe jî dizanin ku hatina me ya ba we ne bardişewha bû. ² Lê bi ser ku me pêşî li Filîpyayê cefa kişand û em hatin riswakirin jî, dîsa me ji Xwedayê xwe cesaret stand ku em di nav gelek dijraberiye de, Mizgîniya Xwedê ji we re bêjin. ³ Çimkî hêvîkirina me ne ji xeletiyê, ne ji nepakiyê û ne jî bi hîleyê ye. ⁴ Lê belê çawa ku em ji aliyê Xwedê ve hatin erêkirin ku ew Mizgîniyê bispêre me, em wusa dipeyivin. Em ne li gor dilê mirovan, lê li gor daxwaza wî Xwedayê ku dilê me diceribîne dipeyivin. ⁵ Wek ku hûn dizanin, me tu caran di gotinên xwe de zimanhilûti* nekiriye û ne jî em bi niyeta çavbirçitiyê peyivîne. Xwedê şahidê me ye! ⁶ Ji ber ku em Şandiyên* Mesîh bûn, me dikarî em giraniya xwe li ser we deynin. Lê em ji mirovan li rûmeta xwe negerîyan, ne ji we û ne jî ji yên din; ⁷ Lê belê wek ku dayikeke zaroşîr zarokên xwe xweyî dike, me xwe di nav we de nerm kir. ⁸ Em bi hezkirineke wusa bi we ve hatibûn girêdan ku êdî me dixwest em ne bi tenê Mizgîniya Xwedê bidin we, lê jiyana xwe jî bi we re leva* bikin,

1:6 Karên Şandiyên 17:5-9

2:2 Karên Şandiyên 16:19-24; 17:1-9

çimkî hûn bûbûn hezkiriyên me. ⁹ Birano, bêguman ew ked û zehmetê me tê bîra we; çaxê ku me Mizgîniya Xwedê ji we re dida, em şev û roj dixebitîn, da ku em ji kesek ji we re nebin bargiranî.

¹⁰ Hûn bi xwe şahid in û Xwedê jî şahid e, ku em bi we bawermendan re çawa bi awayekî paqij, rast û bêqusûr, rabûn û rûniştin.

¹¹ Hûn qenc dizanin, çawa ku bav bi zarokên xwe re dide û distîne, me wusa bi her yekî ji we re da û stand. ¹² Me hûn şidandin, em di ber dilê we de hatin û em li ser sekinîn, ku hûn hêjayî wî Xwedayê ku hûn gazî Padîşahî û rûmeta xwe kirine, rêve herin.

¹³ Û ji bo vê yekê jî em bê rawestin şikir ji Xwedê re dikin ku çaxê we ji me peyva Xwedê bihîst, we ew ne wek peyva mirovan, lê wek peyva Xwedê qebûl kir. Bi rastî jî wusa ye, ev jî di nav we, bawermendan de dixebite. ¹⁴ Çimkî birano, hûn jî ketin eynî rewşa wan civînên bawermendan ên Xwedê yên ku li Cihûstanê* bi Mesîh Îsa ne, we jî eynî cefa ji destê miletê xwe kişand, wek ku wan ji destê Cihûyan kişand. ¹⁵ Wan hem Xudan Îsa, hem jî pêxember* kuştin û tengahî dan me jî. Xwedê ji wan ne razî ye û ew dijraberên hemû mirovan in. ¹⁶ Ew ji me re dibin asteng, da ku em ji miletan re Mizgîniyê nedin, ku ew xilas bibin. Bi vî awayî ew hergav kasa gunehên xwe tije dikin û êdî heta dawiyê ew di bin zezebê de ne.

Xemxwarina ji bo Selanîkiyan

¹⁷ Lê birano, heçî em in, em ji bo demeke kurt ji we hatin veqetandin – ne ku dilê me, lê rûyê me ji hev dûr ket – û me bi daxwazeke mezin xîretkêşî kir ku em rûyê we bibînin. ¹⁸ Ji bo vê yekê me dixwest ku em bîna ba we, ez Pawlos, min bi xwe jî çend caran xwest ku ez bîna, lê Îblîs ji me re bû asteng. ¹⁹ Ma di hatina Xudanê me Îsa de, li ber wî, hêviya me an şahiya me an taca me ya pesindanê çi ye? Erê, ma ne hûn in? ²⁰ Çimkî, rûmet û şahiya me hûn in.

3 Ji bo vê yekê êdî me nikaribû em xwe bigirin. Me qîma xwe anî ku em li Atînayê bimînin tenê ² û me Tîmotêyosê ku birayê me ye û di dayîna Mizgîniya Mesîh de hevalkarê Xwedê ye, şand

ba we, da ku di baweriyê de we qayîm bike û cesaretê bide we,³ da ku di van tengahiyan de tu kes veneleqe. Hûn bi xwe dizanin ku em ji bo vê yekê hatine hilibijartin.⁴ Û çaxê em li ba we bûn, me ji pêşî ve ji we re gotibû ku emê tengahiyan bikişînin û wek ku hûn dizanin wusa jî çêbû.⁵ Ji bo vê yekê, êdî min nikaribû ez xwe bigirim, min Tîmotêyos şand ku ez baweriya we bizanim. Nebe ku Yê Diceribîne hûn ceribandibin û keda me badîhewa çûbe.

⁶ Lê niha Tîmotêyos ji ba we vegeriya û Mizgîniya bawerî û hezkirina we da me. Wî got ku we hergav bi qencî em dianîn bîra xwe û wek ku em bêriya we dikin, hûn jî wusa bêriya me dikin.⁷ Ji bo vê yekê birano, di nav hemû zehmet û tengahiyên me de, bi baweriya we, dilê me li ser we rihet bû.⁸ Madem ku hûn bi Xudan nelebte ne, êdî em dijîn.⁹ Ma ji bo hemû şahiya ku em ji bo we li ber Xwedayê xwe pê şa dibin, em dikarin ji bo we çi şikiriye bidin Xwedê?¹⁰ Em şev û roj bi dil û can dua dikin, da ku em rûyê we bibînin û kêmahiyên baweriya we temam bikin.

¹¹ De bila Bavê me Xwedê bi xwe û Xudanê me Îsa berê riya me bide we.¹² Û ka çawa hezkirina me ji bo we zêde ye, bila Xudan hezkirina we ji bo hevdu û ji bo hemûyan mezin û zêde bike,¹³ da ku dilê we xurt bike, ku çaxê Xudanê me Îsa bi hemû pîrozên* xwe ve bê, hûn li ber Bavê me Xwedê di pîroziyê de bêkêmahî bin.

Jiyana ku li Xwedê Xweş Tê

4 Ji vê pê ve birano, hûn ji me hîn bûn ku divê hûn çawa rêve herin, da ku hûn li Xwedê xweş bîn, çawa ku hûn rê ve diçin jî. Em bi navê Xudan Îsa ji we hêvî dikin û we dişidînin ku hûn di vê yekê de hê bêtir pêşve herin.² Hûn dizanin ku me ji aliyê Xudan Îsa ve çi tembîh dane we.³ Çimkî daxwaza Xwedê ev e: Ku hûn pîroz bibin, yanî hûn xwe ji fuhûşê bidin paş;⁴⁻⁵ ne wek milletên ku Xwedê nas nakin di xwestekên şehwetê de, lê bila her yek ji we bizane ku di paqijî û şîrhelaliyê de li bedena xwe bibe xweyî.⁶ Û di vê yekê de tu kes heqê birayê xwe nexwe û li hember wî sîc neke. Wek ku me pêşî ji we re got û tembîh li we kir, Xudan ji bo van hemû tiştan heyfê hiltîne.⁷ Çimkî Xwedê ne ji bo pîsîtiyê, lê ji

bo pîroziyê gazî me kiriye. ⁸ Îcar yê ku vê yekê red dike, ew ne mirov red dike, lê ew wî Xwedayê ku Ruhê xwe yê Pîroz dide we, red dike.

⁹ Lê ji bo biraheziyê, hewcedariya we tune ku em ji we re binivîsin, çimkî hûn bi xwe ji aliyê Xwedê ve hatine hînkirin, ku hûn ji hevdû hez bikin. ¹⁰ Ji xwe hûn vê yekê ji bo hemû xwişk û birayên ku li seranserê Mekedonyayê ne, dikin. Lê xwişk û birano, em hêvî ji we dikin ku hûn di vê yekê de hê bêtir pêşve herin. ¹¹ Bixebitin ku jiyana we bêpêjin be û wek ku me tembîh li we kir, hûn bi xebata xwe ve mijûl bibin û bi destên xwe bixebitin, ¹² da ku hûn li hember yên ku li derve ne, bi awayekî serfiraz rêve herin û hewcedarê tiştêkî nebin.

Vegerîna Xudan

¹³ Xwişk û birano, em naxwazin ku hûn li ser yên razayî nezan bimînin, da ku hûn wek wan ên din ên ku hêviya wan tune xemgîn nebin. ¹⁴ Madem ku em bawer dikin Îsa mir û rabû, bi wî awayî jî Xwedê wê wan ên ku di baweriya Îsa de razane bi wî re bîne.

¹⁵ Em vê yekê bi peyva Xudan ji we re dibêjin: Em ên ku dijîn û heta hatina Xudan sax dimînin, em qet nakevin pêşiya yên razayî. ¹⁶ Çimkî Xudan bi xwe wê bi gazîkirineke fermanî, bi dengê serekmiyaket û bi lîxistina boriya Xwedê ji ezmên bê xwar û pêşî miriyên ku yên Mesîh in, wê rabin. ¹⁷ Piştî, em ên ku dijîn û sax mane, emê bi wan re di ewran de bîn rahiştin, da ku di hewayê de em herin pêşiya Xudan û bi vî awayî emê her û her bi Xudan re bin. ¹⁸ Îcar bi van peyvên di ber dilê hev de werin.

5 Lê ji bo dem û wextan birano, ne hewce ye ku em tiştêkî ji we re binivîsin. ² Hûn bi xwe qenc dizanin, ka diz bi şev çawa tê, Roja Xudan wê wusa bê. ³ Gava xelk dibêjin: «Dinya aştî û ewledarî ye», hingê wek êşa jina bizaro, helak wê ji nişkê ve bê ser wan û qet nikarin xilas bibin. ⁴ Lê hûn birano, hûn ne di tariyê de ne, ku ew roj wek dizan bi ser we de bigire. ⁵ Çimkî hûn hemû zarokên ronahiyê û zarokên rojê ne. Em ne ji şevê û ne jî ji tariyê ne.

4:15-17 1 Korîntî 15:51-52 5:2 Metta 24:43; Lûqa 12:39; 2 Petrûs 3:10
4:13 «yên razayî» li vir bi vê manê ye: «yên mirî».

⁶ Nexwe em wek ên din ranezin, lê em hişyar û li ser hişê xwe bin.
⁷ Çimkî ew ên ku radizin, bi şev radizin û ew ên ku serxweş dibin, bi şev serxweş dibin. ⁸ Lê ji ber ku em ji rojê ne, divê em li ser hişê xwe bin û zirxê bawerî û hezkirinê wergirin û kumzirxê hêviya xilasbûnê bidin serê xwe. ⁹ Çimkî Xwedê em ne ji bo xezebê nîşan kirine, lê em nîşan kirine, da ku em bi Xudanê me Îsa Mesîh bigihîjin xilasîyê. ¹⁰ Ew ji bo me mir, da ku, dixwazî em hişyar an jî razayî bin, em bi wî re bijîn. ¹¹ Ji bo vê yekê, wek ku hûn niha dikin, di ber dilê hev de werin û hevdû ava bikin.

Tembîh û Silavên Aştiyê

¹² Îcar em hêvî ji we dikin birano, bizanin ew ên ku di nav de dixebitin, di baweriya Xudan de serweriyê li we dikin û şîretan li we dikin, kî ne! ¹³ Ji bo xebata wan ji wan hez bikin û bi zêdehî siyaneta* wan bigirin. Bi hev re di aştiyê de bin. ¹⁴ Birano, ji bo vê yekê em ji we hêvî dikin: Şîretan li yên ku jiyana wan bêserûber e bikin, hanê* bidin bêziravan, ji yên qels re bibin piştevan, li hember hemû mirovan bîhnfireh bin. ¹⁵ Binêrin! Tu kes di şûna xerabiyê de xerabiyê li yekî neke, lê hergav bikevin pey qencyê, hem ji bo hev, hem jî ji bo hemû mirovan.

¹⁶ Hergav şa bibin, ¹⁷ bê rawestin dua bikin, ¹⁸ di her tiştî de şikir bikin, çimkî daxwaza Xwedê, bi Mesîh Îsa ji bo we ev e. ¹⁹ Ruhê Pîroz netemirînin. ²⁰ Pêxemberîtiyan kêmbûnin. ²¹ Her tiştî ji hev derxin, tiştê qenc hişk bigirin. ²² Xwe ji her cûreyê xerabiyê dûr bixin.

²³ De bila Xwedayê aştiyê bi xwe we bi tevahî pîroz bike û hemû ruhê we, canê we û bedena we ji bo hatina Xudanê me Îsa Mesîh, bêqusûr bê parastin. ²⁴ Ewê ku gazî we dike, dilsoz e û ewê bike jî.

²⁵ Birano! Ji bo me jî dua bikin.

²⁶ Bi ramûsana pîroz silavan li hemû birayan bikin. ²⁷ Ez li ber Xudan tembîh li we dikim ku ev name, li ber hemû birayan bê xwendin.

²⁸ Kerema Xudanê me Îsa Mesîh li ser we be.

5:8 Îşaya 59:17; Efesî 6:13-17

5:10 «hişyar an razayî» li vir bi vê manê ye: «zindî an mirî».

Nameya Pawlos a diduyan ji Selanîkiyan re

Pêşgotin

Piştî girtina nameya pêşî, di nav bawermendên di Selanîkê de hê pirsên li ser hatina Îsa Mesîh a diduyan hebûn. Di vê nameyê de, Pawlos li ser van pirsan radiweste û wan dişidîne ku heta hatina Îsa jiyaneke bi rêz û bi pergal bijîn. Pawlos ji bawermendan dixwaze ku hişk bi baweriya xwe ve girêdayî bimînin, li hember zor û zehmetan ji biryara xwe bi şûn de venegerin (1:4, 6-7).

Ev name dikare bi vî awayî bê beşkirin:

I. Silav 1:1-2

II. Razîbûn û cesaretdan 1:3-12

III. Hînkirina li ser hatina Mesîh 2:1-17

IV. Şîretên li bawermendan 3:1-15

V. Gotina dawî 3:16-18

Silav

1 Ji Pawlos*, Sîlas* û Tîmotêyos*, ji civîna* bawermendan a Selanîkiyan re, ya ku bi Bavê me Xwedê û bi Xudan Îsa Mesîh e:

² Ji Bav Xwedê û ji Xudan Îsa Mesîh, kerem û aşî li ser we be.

Vegeîna Îsa û Dîwana Dawî

³ Ya birano, em deyndar in, ku hergav ji bo we ji Xwedê re şikir bikin. Û ev yek li cih e jî, çimkî baweriya* we gelek mezin dibe û hezkirina her yekê ji we ji bo hevdû zêde dibe. ⁴ Wusa ku em bi xwe jî di nav civînên Xwedê yên bawermendan de, ji bo semax* û baweriya we ya li hember wan hemû cefa û tengahiyên ku hûn dikişînin, pesnê xwe bi we didin. ⁵ Ev yek nîşana dîwan-kirina* Xwedê ya dadperwer* e. Wusa ku hûn hêjayî Padîşahiya* Xwedê bin, ya ku hûn di ber de tengahiyê dikişînin. ⁶ Çimkî, ev di çavê Xwedê de rast e ku tengahiyê bide wan ên ku tengahiyê didin we ⁷ û we bi me re rihet bike, hûn ên ku tengahiyê dikişînin. Ev wê weha be: Gava Xudan Îsa bi milyaketên xwe yên bihêz ve di pêta

êgir de ji ezmên xuya bibe,⁸ hingê ewê heyfê ji wan ên ku Xwedê nas nakin û ji wan ên ku bi ya Mizgîniya Xudanê me Îsa nakin, bistîne.⁹ Ew mirov wê ji ba Xudan û ji rûmeta qeweta wî bîn avêtin û cezayê helakbûna herheyî bikişînin.¹⁰ Wê Rojê gava ew bê, ewê di nav pîrozên* xwe de bê birûmetkirin û ji aliyê hemû bawermendan ve bi heyranî bê dîtin. Hûn jî, hûnê di nav wan de bin, çimkî we baweriya xwe bi şahidiya me anî.

¹¹ Ji bo vê yekê em hergav ji bo we dua dikin, ku Xwedayê me we bike hêjayî vê gazîkirinê û bi hêza xwe her daxwaza we ya qencyê û kirinê we yên ji baweriyê pêk bîne.¹² Wusa ku li gor kerema Xwedayê me û Xudan Îsa Mesîh, navê Xudanê me Îsa Mesîh bi we bê birûmetkirin û hûn bi wî bîn birûmetkirin.

Xuyabûna Mirovê Bêqanûniyê û Vegerîna Mesîh

2¹⁻² Îcar em hêvî ji we dikin birano ku hûn ne bi ruh, ne bi gotinê, ne jî bi nameyeke wek ku ji me be, bi gotinê wek, «Niha êdî Roja Xudan hatiye», li ser hatina Xudanê me Îsa Mesîh û kombûna me ya li ba wî, di fikrên xwe de zû veneleqin û şaş nebin.³ Bila tu kes bi tu awayî we nexapîne, çimkî heta ku pêşî ew vegerîna ji baweriyê çênebe û ew mirovê bêqanûniyê yê ku kurê helakê ye, eşkere nebe, ew roj nayê.⁴ Ewê li hember her tiştê ku jê re xwedê tê gotin an tê perizîn* rabe û xwe di ser her tiştî re bigire, heta ewê di Perestgeha* Xwedê de rûne û bêje: «Ez Xwedê me.»

⁵ Ma nayê bîra we gava ku ez hê li ba we bûm, min ev tiştên ha ji we re digotin?⁶ Hûn dizanin, ji bo ku ew mirov di wextê xwe de xuya bibe, niha tiştê ku dibe asteng çî ye.⁷ Çimkî ji xwe sira bêqanûniyê dixebite, lê yê ku niha dibe asteng wê bibe asteng heta ku ew ji holê bê rakirin.⁸ Ê hingê yê bêqanûn wê xuya bibe, yê ku Xudan Îsa wê bi hilma devê xwe wî bikuje û wê bi şewqa hatina xwe wî helak bike.⁹ Hatina yê bêqanûn wê li gor xebata Îblîs be, wê bi hemû hêz û bi nîşan û kerametên derewîn be¹⁰ û ji bo yên ku helak bibin, wê bi hemû xapandina neheqiyê be; çimkî wan ji bo xilasbûna xwe hezkirina rastiyê qebûl nekir.¹¹ Ê ji ber vê yekê Xwedê hêza xapandinê bi ser wan de dişîne ku baweriya xwe bi

2:1 1 Selanîkî 4:15-17

2:8 Îşaya 11:4

2:4 Hezekiyêl 28:2; Daniyêl 11:36

2:9 Metta 24:24

wê derewê bînin,¹² da ku ew hemû yên ku baweriya xwe bi rastiye neanîne, lê kêfa wan ji neheqiyê re hatiye, bèn dîwankirin.

Xwedê ji bo Xilasbûnê Gazî Me Kiriye

¹³ Ey birayên ku ji aliyê Xudan ve tîn hezkirin, em deyndar in ku her gav ji bo we ji Xwedê re şikir bikin. Çimkî Xwedê hê ji destpêkê ve hûn bijartin, da ku hûn bi pîrozkirina Ruh û bi baweriya rastiye xilas bibin.¹⁴ Wî bi Mizgîniya me hûn gazî vê rizgariyê kirin, da ku hûn bigihîjin rûmeta Xudanê me Îsa Mesîh.¹⁵ Îcar, madem ku wusa ye birano, nelebte bin û wê hîndariya ku bi gotinên me an jî bi nameyên me hûn hîn bûne, hişk bigirin.

¹⁶ Bila Xudanê me Îsa Mesîh bi xwe û Bavê me Xwedê, yê ku ji me hez kiriye û bi keremê hana* herheyî û hêviya qenc daye me,¹⁷ di ber dilê we de bê û we di hemû kirin û gotinên qenc de qayîm bike.

Ji bo Me Dua Bikin

3 Ji vê pê ve xwişk û birano, ji bo me dua bikin, da ku peyva* Xudan wek ku di nav we de çêbû, zû pêşve here û bi rûmet bibe.² Dua bikin, da ku em ji mirovên dijraber û xerab xilas bibin, çimkî hin hene ku baweriya wan tune.³ Lê Xudan dilsoz e, ewê we qayîm bike û ji Yê Xerab biparêze.⁴ Em bi saya Xudan ji we pişt-rast in ku çi tiştên me li we tembîh kirine, hûn dikin û hûnê bikin jî.⁵ Îcar bila Xudan dilê we ber bi hezkirina Xwedê û sebira Mesîh ve bibe.

Tembîha ji bo yên Bêpergal û Bêxîret

⁶ Îcar birano, em bi navê Xudanê xwe Îsa Mesîh emir li we dikin ku hûn xwe ji her birayê ku ne li gor wê hînkirina ku we ji me standiye, lê bi awayekî bêserûber dijî, dûr bixin.⁷ Hûn bi xwe dizanin ku divê hûn bibin mîna me, çimkî em di nav we de bi awayekî bêserûber nejiyan.⁸ Me nanê belaş ji tu kesî nexwar, lê em bi ked û zehmet şev û roj dixebitîn, da ku em ji kesekî ji we re nebin bargiranî.⁹ Ne ji ber ku desthilatiya me tunebû, lê ji bo ku em ji we re bibin mînak, me ev kir, da ku hûn bibin mîna me.

2:13 Di hin destnivîsaran de di şûna «ji destpêkê ve» de ev heye: «wek berê pêşî».

¹⁰ Çimkî, gava ku em hê li ba we bûn, me di vê yekê de tembîh li we dikir: «Eger yek nexwaze bixebite, bila xwarinê jî nexwe.»

¹¹ Niha em dibihîzin ku di nav we de hinek hene, bi awayekî bê-serûber dijîn, tu xebatê nakin, bi ser de jî tevli karûberên yên din jî dibin. ¹² Em bi navê Xudan Îsa Mesîh emir li yên weha dikin û wan dişidînin ku ew bêpêjin bixebitin û nanê xwe bixwin.

¹³ Lê hûn, xwişk û birano, ji qencîkirinê newestin. ¹⁴ Îcar, eger yek guhdariya gotinên me yên ku di vê nameyê de ne neke, wî nîşan bikin û hevaltîyê bi wî re nekin, da ku şermî bibe. ¹⁵ Wî wek dijmin nehesibînin, lê belê wek bira şîretan lê bikin.

Silavên Aştiyê

¹⁶ Îcar bila Xudanê aştiyê bi xwe, her gav û bi her awayî aştiyê bide we. Xudan bi we hemûyan re be.

¹⁷ Ez Pawlos, vê silavê bi destê xwe dinivîsim. Ev nîşan di her nameya min de ye, ez weha dinivîsim. ¹⁸ Kerema Xudanê me Îsa Mesîh li ser we hemûyan be.

